

MOSI NA KATI YA DIFUKU



Matondo na nge, mpangi-bakala. Matondo na nge, Mpangi Shakarian.

Mpe mbote, bankundi ya munu. Ya kieleka ya kele mbote na kuvwanda diaka awa na Los Angeles na suka yayi, na ntwala ya lukutakanu yayi ya nene, mpe na ntwala ya balukutakanu yina ke salama na sabala yayi ke kwisa na Hotel Embassy. Mu ke vingila kumona beno nionso kuna. Mpe beto nionso ke vingila na kukutana na Mfumu ya beto Yesu, samu na kumona Yandi kuna. Yandi silaka ti Yandi ke vwanda, “kisika zole to tatu me vukana,” Yandi ke vwanda kuna.

² Mpe mu ke kwikila ti mu me kutana na Yandi na suka yayi ntangu mu vwandaka mata samu na kukwisa awa na kivinga yayi, ntangu bantu nionso na mabanza ya nene, vwandaka vingila na ntima tiya-tiya madia ya suka mpe malongi. Mpe ya kele mbote na kuvukana awa na beno, mpe na bayina ke na kuwa beto na radio. Ya ke na bantu mingi awa, ti ba ke . . . Mu zolaka kulumuka na étage ya nsi, samu na kutuba na bantu fioti kuna. Mpe mu me mona balombilu mingi, bimbevo ya ntima, mpe mwa bimbevo ya luswaswanu ya banzutu ya bawu, mpe beto kele awa ntangu yayi samu na kusambila samu na bambevo mpe bantu yina kele na mpasi.

³ Kaka na ntangu me kuma na nsongi ya kikalu . . . Mu vwandaka tala kaka bakala ya kiboba. Yandi kwisaka na munu, mpe yandi tubaka, “Mpangi Branham, bamvula me luta . . .” Yandi tubaka ti yandi vwandaka na kimbevo ya nene ya ntima ti yandi . . . bawu banzaka ti yandi zolaka kufwa. Mpe mu sambilaka samu na yandi, mpe lemvo ya Nzambi belusaka yandi. Mpe yandi yayi awa na suka yayi, yandi kele na bamvula makumi nana, yandi ke na kiesa kaka. Na yawu yina ke pesa beto kivuvu ya malu-malu.

⁴ Mpe ntangu yayi mu ke lomba kieleka bisambu ya bantu yina ke kuwa na radio, mutindu mosi bayayi kele awa. Na manima ya lukutakanu yayi, mu ke kwenda na Europe, na Afrique mpe bisika yankaka, samu na balukutakanu. Mpe mu ke kwenda kuna na kulandilaka vision, na yawu ya ke vwanda lukutakanu ya nene kuna, mu me ndima. Mpe ya me kuma bamvula ti mu ke na kutala ti Mfumu zola munu kuvutuka kuna. Mwa ministere yayi ya kukikulumusa, ya kukikulumusa yina Yandi pesaka munu, mu ke banza ve ti Yandi me manisa ntete na yawu, kuna. Ya me monana ti ya fwana vwanda na moyo mosi kisika mosi kuna yina mu lendaka kanga na filet ya Nsangu ya mbote, yina Yandi pesaka munu samu na kulonga bantu, na nzila ya kubeluka ya Kinzambi, kusambila samu na bambevo. Mpe ya

kieleka mu ke lomba bisambu ya beno, beno bantu kele awa mpe bayina ke na kuwa na radio.

⁵ Mu ke na ntangu ve ya kubaka dilongi mosi mpe kulonga, yina mu ke banza kusala na mwa minuti fioti awa na—na . . . na kivinga yayi, kasi mu ke tuba na—na beno kaka na mwa ntangu fioti, samu beto zabana. Mpe na bantu yina kele na kati ya yinsi, mu ke sambila samu na bantu yina, kele kuna, mpe samu na beno yina kele awa mpe. Mpe ya kieleka mu ke na kiese na kukutana na bankundi yayi nionso ya malu-malu yina mu me kutanaka na bawu ata fioti ve na ntwala, na mutindu beto me zabana na bawu na suka yayi.

⁶ Beto me lutisa bantangu ya kitoko na balukutakanu na bisika yankaka. Mu ke basika diaka mingi ve, mu ke na mingi ya kusala. Beto ke meka kaka na kuzieta kati-kati ya Jeffersonville, Indiana na Tucson, Arizona, kisika beto kwendaka zinga na mwa bamvula fioti me luta, na nzila ya vision ya Mfumu, yina tindaka beto kuna, diaka, kukondwa kuzaba kisika mu vwandaka kwenda. Mpe mingi na kati ya beno awa, na cafetaria ya Clifton, mu tubaka fioti na beno na ntwala mu kwenda, mpe na lukutakanu ya Phoenix, samu na vision yina kwisaka. Mu monaka Bawanzio sambwadi na cluster.

⁷ Mpe mu zaba, na bayina ke kuwa na radio, ntangu yankaka mingi na kati ya beno kele ya Nsangu ya mbote ya muvimba, mpe yayi lendaka monana fioti diambu ya mansweki samu na beno. Mutindu mosi, ya ke vwanda samu na munu, kasi ya ke . . . Kana muntu mosi lendaka tendula kima mosi, beno fwana ndima yawu diaka ve na nzila ya lukwikilu. Ya ke kima yina beto lendaka tendula ve, yina beto fwana ndima na nzila ya lukwikilu. Beto lenda tendula Nzambi ve. Muntu mosi ve lenda tendula Nzambi. Yandi kele muyadi ya luyalu, mpe Yandi kele nene mpe ngolo. Beto ke—beto ke ndima yawu samu beto zaba ti Yandi kele kuna. Na manima na nzila ya lukwikilu ya beto, na kundimaka yawu, Yandi natilaka beto mvutu, mbotika ya Mpeve-Santu.

⁸ Na yina, mu ke tuba na beno, na mwa ntangu fioti awa, samu na, nzila ya “Nzambi,” to, “kisika ya kusambila.” Mpe kisika mosi kaka yina beno lenda sambila Yandi, kisika mosi kaka Yandi ke kutana na beno, ya ke . . . Ya ke na Dibuundu mosi, kisika mosi, ntangu mosi, nkonga mosi ya bantu, nionso yawu yina Nzambi ke kutanaka na yawu. Mpe mu ke na kivuvu ti Mfumu me sakumuna Nsangu na bantima ya beno awa.

⁹ Ntangu yayi, kukwisa na Tucson, ya vwandaka ya ngitukulu, ba-visions yina mu ke tuba na beno na Nkumbu ya Mfumu. Mosi ve na kati ya yawu kubanda ntama na mutindu mu ke bambuka moyo, mu ke lomba na konso muntu yina na kubambuka munu moyo, ti Yandi tubaka kima mosi yina vwandaka Kieleka ve. Yawu salamaka kaka na mutindu Yandi tubaka ti ya ke salama.

¹⁰ Mpe landila Masonuku, Yandi fwana vutuka na beto na bilumbu ya nsuka, na ministere ya mutindu yayi. Ya ke vwanda na manima ya mbotika ya Mpeve, kutuba bandinga ya malumu, mpe kubeluka ya Kinzambi, mpe nionso yina, na manima ya bima yayi. Mbieka ya nsangu ya Pentecote kele yina beto ke tubila bubu yayi. Ministere ya Klisto Yandi mosi me talisama na kati ya bantu ya Yandi, na bima ya mutindu mosi yina Yandi salaka ntangu Yandi vwandaka awa na zulu ya ntoto; na kati ya Nzutu ya Yandi, Kento ya makwela, yina kele kitini ya Yandi, na kusalaka bima ya mutindu mosi, mutindu Bakala na Kento, to Ntinu na Ntinu-kento, na ntwala ya nkinzi ya Makwela.

¹¹ Sabala yayi, kana Mfumu me zola, mu ke zola tubila yawu fioti, campagne ya beto awa, na Hotel Embassy, mpe samu na kuzabana na mutindu ya munu ya kukukulumusya ya kusala yawu. Ntangu na ngunga yina beto ke na kuzinga, kana muntu zaba ve wapi nzila ya kukwenda, yinki kusala to wapi lweka kubaluka, beno ke—beno ke tambula diaka ve na lukwikilu; beno ke na kubanza kaka, beno ke na kumeka. Mpe *kumeka* kele “ku—kutambula kukondwa kiyeka ya kieleka.” Na yawu kana beto ke na kiyeka ya kieleka ve samu na kuzaba yina Nzambi tubaka ti ya ke salama na ngunga yayi, wapi mutindu beto ke kutana na ngunga yayi? Mpe beto fwana kutana na yawu, na kuzabaka, na nzila ya lukwikilu na Ndinga ya Yandi, bima yina fwana salama ntangu yayi, mpe mutindu ya bayinsi, mutindu ya bantu, mutindu ya dibuundu, mpe nionso yina.

¹² Beto fwana zaba yawu, na manima kuzaba wapi mutindu kutambula samu na kukutana na yawu. Kana beno zaba ve wapi mutindu kusala yawu, beno ke sala kaka—kaka yina beto vwandaka bokila, na ntangu yina, na kisaka-saka; kumeka siansi, na kutulaka kivuvu ti ya ke salama, na kutulaka kivuvu na *yayi* mpe na kutulaka kivuvu na *yina*, mpe “ya ke salama?” Kasi Nzambi zola ve ti beto sala mutindu yina. Yandi zola ti beto zaba yina Yandi tubaka samu na kilumbu yayi, na manima kukutana na yawu na nzila ya lukwikilu, samu Yandi tubaka ti ya ke vwanda mutindu yina. Na yina beto—beto zaba ti beno kele Kieleka na ntangu yina, samu beno me kuzwa ve na ndinga ya muntu; beno me kuzwa Ndinga ya Yandi samu na yina beto fwana sala. Mpe beto ke tula kivuvu ti Tata ya beto ya Mazulu ke—ke pesa beto yawu na sabala yayi.

¹³ Ntangu yayi, beno lemvokila munu samu mu me zenga, yina mu vwandaka tuba na mwa ntangu fioti me luta, samu na yina me tala kukwisa na Tucson. Mpe mu banzaka, munu mosi, ti ya vwandaka nsuka ya luzingu ya munu. Mu banzaka ti muntu mosi ve lendaka kanga ntima samu na choc ya mutindu yina salamaka kuna na vision na suka yina, pene ya ngunga ya kumi na yinzo ya munu, mpe kuzinga na manima ya yawu. Na yina, mu kwisaka na Tucson, mu wisanaka na mwana ya munu ya bakala, samu ti kento ya munu mpe—mpe bana kukwenda vwanda na yandi na

manima ya kukwenda ya munu, samu ti mu vwandaka banza ti ya vwandaka nsuka ya munu. Mpe munu, na Phoenix mpe ntete balukutakanu mingi kusalama, mu ke tubaka kaka na beno mutindu ya ke salama.

¹⁴ Mbote, mwa bangonda fioti na manima ya yawu, mu vwandaka na Canyon Sabino na suka mosi, yina kele na Nord ya Tucson. Mu vwandaka na zulu kuna samu na kusambila. Mpe na ntangu mu vwandaka sambila, diboko ya munu vwandaka na zulu, mu tubaka, “Tata, mu ke sambila Nge ti Nge ke sadisa munu na mutindu mosi to yankaka, pesa munu ngolo, samu na ngunga yina mu ke kutana na yawu ntangu yayi. Mpe kana kosalu ya munu me suka awa na zulu ya ntoto, na yina mu fwana kwisa na Nge. Mpe ya kele ve ti mu ke na kiadi samu mu ke kwisa, kasi mu zaba ti Nge ke kengila dibuta ya munu. Mpe mu—mu ke lomba kaka ngolo samu na ngunga yayi.” Mpe kima mosi bulaka diboko ya munu!

¹⁵ Ntangu yayi, samu na beno ke kuwa na radio, yina mu me tuba lendaka vwanda ya ngitukulu, kasi ya kele kieleka. Mpe Nzambi kele zuzi ya munu.

¹⁶ Mu talaka na diboko ya munu, mpe ya vwandaka na mbele ya yinda, ya vwandaka na kiswamo na diboko ya yawu. Mpe diboko yawu mosi vwandaka ya nacre, mpe ya monanaka kaka mutindu ya kiswamo ya wolo na lweka ya diboko. Mpe mbele yawu mosi monanaka mutindu ya vwandaka ngenga, oh, kima mosi mutindu chrome to kima mosi vwandaka ngenga na mwini.

¹⁷ Ntangu yayi, ya vwandaka pene ya ngunga kumi to kumi na mosi na suka, mu vwandaka kuna na zulu ya mongo. Beno lenda banza mutindu nsatu yina muntu mosi (ya ke monana ti mu ke na mabanza ya mbote) lendaka vwanda na yawu ya kutalama kuna na mbele yina me katuka kisika mosi ve, ata muntu mosi ve pene-pene na ba-kilometre, kusimba yawu na diboko ya yandi. Mu simbaka yawu, mu bakaka yawu mpe mu balulaka mbele na lweka mosi mpe yankaka, mpe, na yina, ya vwandaka mbele.

¹⁸ Mpe mu talaka na lweka. Mu tubaka, “Mbote, ntangu yayi, wapi mutindu ya lendaka salama? Mu me telama awa, kaka, awa, mpe muntu mosi ve pene-pene na ba-kilometre na ba-kilometre, mpe wapi sika ya me katuka?” Mpe mu tubaka, “Mbote, mu—mu banza ntangu yankaka ya kele Mfumu ke tuba na munu ti ya kele ntangu ya munu ya nsuka.”

Mpe Ndinga mosi zonzaka mpe tubaka, “Yayi kele Mbele ya Mfumu.”

¹⁹ Mpe mu banzaka, “Mbote, mbele, na yina ya kele. . . samu na ntinu, samu na kupesa muntu kisika ya munati mpunda,” beno zaba, mutindu ba vwandaka sala na Angleterre mpe bisika yankaka. Mu banzaka, “Yawu yina mfunu ya yawu, samu na kupesa muntu kisika ya munati mpunda.” Mpe mu banzaka, “Mbote, ntangu yankaka mu fwana tetika maboko na zulu ya

bantu, to. . .” Mu vwandaka na. . .Mabanza ya munu lendaka vwanza ya kuvwalangana, beno zaba. Beno me zaba ve. Mabanza ya beto kele na nsuka; ya Yandi kele na nsuka ve. Na yawu, mpe kaka na ntangu yina mu vwandaka, yawu. . .Na manima yawu bikaka diboko ya munu mpe mu zaba ve kisika ya me kwenda, yawu zimbanaka kaka. Na yina, kana muntu mosi lendaka bakula fioti mambu ya kimpeve, beno—beno fwana kuma diboma. Beno fwana telama kuna, kukiyufula yina me salama.

²⁰ Mpe Yandi tubaka, “Vision zola tuba ve ti ya kele ntangu ya nge ya nsuka. Ya kele samu na ministere ya nge. Mbele yina kele Ndinga. Bidimbu Sambwadi ke zibuka, mansweki ya. . .”

²¹ Na manima ya basabala zole na manima ya yina, to bangonda zole, mu zola tuba, na manima ya yina, mu vwandaka kuna na zulu ya mongo na nkonga ya bankundi ya munu ntangu yawu salamaka. Bawanzio sambwadi, kaka pwelele mutindu beno me telama awa, kulumukaka na Zulu. Matadi vwanza katuka na miongo mpe vwanza kubwa na balubwaku, mpe—mpe bantu yina vwanza kuna bandaka na kuboka mpe nionso yina, beno zaba, mpe putulu vwanza pumbuka bisika nionso. Mpe ntangu ya salamaka, Yandi tubaka, “Vutuka na yinzo ya nge. Ya ke vwanza ntangu yayi, konso Wanzio ke vwanza kidimbu mosi samu na Bisimbu Sambwadi.”

²² Na yina, ya kele na bande. Mpe buku ke basika ntangu mingi ve, ba ke na kutula grammaire ya mbote. Mutindu beno me zaba, grammaire ya munu kele mbote ve, mpe bantu lendaka ve. . .Beno fwana vwanza bantu yina ke zolaka munu mpe kuzaba wapi mutindu kubakula munu samu na grammaire ya munu. Kasi théologien mosi ke na kutula grammaire ya mbote samu na munu, mpe ya ke na kukatula nionso yina. . .Mbote, ntangu yankaka mu sadilaka mpova ya yimbi kuna. Mu zabaka ve. Na yawu, mu me kuwa muntu mosi ke seka, mu banza ti “grammariser” kele mbote ve. Kasi ya ke mutindu Hollandais, beno baka yina mu zola tuba kasi yina mu ke tuba ve, ntangu yankaka.

²³ Mpe ya me bikala na minuti tatu ntangu yayi, ba me tuba na munu, samu na kusukisa manaka.

²⁴ Ntangu yayi, beno bantu ya luzolo ke kuwa yayi na radio, mpe beno yina kele na kimbevo mpe nsatu awa na kati ya kivinga, beno lenda tetika maboko ya beno na zulu ya mosi na yankaka ntangu yayi na ntangu beto kele na mbele yayi ya kisambu samu na bambevo. Ntangu yayi, Yesu tubaka, lutumu ya Yandi ya nsuka na Dibuundu, “Bidimbu yayi ke landa bayina ke kwikila.” “Bayina,” bayina ke kwikila! “Kana bawu tetika maboko ya bawu na zulu ya bambevo, bawu ke beluka.”

²⁵ Tata ya luzolo ya Mazulu, beto kele mutindu bana bubu yayi, beto ke lemfuka na yina Nge tubaka na kusala. Beto ke tetika

maboko na zulu ya balombilu yayi nionso ya allo-allo. Nge ke mona na yinsi kuna, mutindu bawu kele na nsatu, bampasi. Nge ke mona bayina kele awa na bansatu, bampasi. Mpe beto ke pesa bawu na Nge, Nzambi ya luzolo, na lukwikilu yayi na Ndinga ya Nge yina Nge me tubaka, “Bidimbu yayi ke landa bayina ke kwikila. Kana bawu tetika maboko ya bawu na zulu ya bambevo, bawu ke beluka.” Pesa yawu, Mfumu, na Nkumbu ya Yesu Klisto. Amen. [Kisika ya mpamba na bande—Mu.]

[Mpangi Branham me manisa nsamunu ya ntete na radio—Mu.]



²⁶ Matondo na nge, Mpangi Shakarian. Ya kieleka ya ke ntangu mosi ya mbote na kuvwanda diaka na bansinga ya radio, samu na kutuba na bankundi ya beto yina ke kuwa na radio, mutindu mosi bayina kele awa.

²⁷ Mpe ya kieleka beto ke bokila beno, na kukwisa mbasi na manima ya midi na Hotel Embassy, samu ba sambila samu na beno. Mpe yina kaka ve, kasi beno nata bantu yina kele bansumuki mpe bayina kele ba-retrograde. Kana beno ke sambila kaka samu na bambevo, mpe beno ke mona ti Nzambi ke sala ntangu nionso bimangu ya nene, kasi yina ke baka kisika ya zole. Kima ya mfunu mingi kele kuvwanda ya kuvuluka, kuvwanda ya kufuluka na Mpeve ya Nzambi, yina mu ke tubila beno na mwa ntangu fioti awa, mpe mfunu ya kulutila samu na beto na kuvwanda ya kufuluka na Mpeve ya Nzambi.

²⁸ Mpe kubeluka ya Kinzambi ke bendaka bukebi ya bantu, mpe ke nataka bawu na Ntwala ya Nzambi. Ntangu Nzambi ke sala kima yina—yina bawu zaba ti ba lenda ba- . . . mbote, yina ba lenda bakula ve. Beto lenda ve talisa mutindu ya ke salaka. Nzambi ke salaka yawu na mutindu ya Yandi Mosi yina kele ya kitoko. Na yina ya ke benda bukebi ya bantu, samu na kuzaba ti ya kele na Mvwandulu ya Ngolo kisika mosi kuna, yina lenda sala kima yina kele na zulu ya lubakusu ya muntu, mpe yina ke tinda bawu na kutala na Mwana-dimeme ya Nzambi. Mpe ntangu nionso, kubeluka ya Kinzambi, ba tubaka na munu, mpe mu ke kwikila, munu mosi, ti pene ya bamvula makumi sambanu, ntangu yankaka, mpe makumi sambwadi na zulu ya nkama mosi, ya ministere ya Mfumu, vwandaka na zulu ya kubeluka ya Kinzambi. Mpe Yandi salaka yawu samu na kubenda bukebi ya bantu. Na yina ntangu ba vwanda kuna, Yandi tubaka, “Kana beno kwikila ve ti Mu kele Yandi, beno ke kufwa na masumu ya beno.”

²⁹ Ntangu yayi, kubeluka ya Kinzambi kele kubenda mosi ya kitoko, kunata bantu na kutala na Mfumu Yesu. Mpe Docteur F. F. Bosworth, yina mingi na kati ya beno, ya vwandaka nkundi ya bawu, mpe zabaka yandi, mpe ministere ya yandi zolaka tuba mingi samu na munu mutindu longi ya ntwenia. Mu bandaka

na kusala balukutakanu ya munu kuna, mpe mu kutanaka na Mpangi Bosworth. Yandi vwandaka tuba, “Kubeluka ya Kinzambi,” ya ke mwa mulabu mosi ya mbala mosi ntangu yayi, yandi tubaka, “Kubeluka ya Kinzambi kele pambu na ndobo.” Yandi tubaka, “Beni fwana talisa ndobo na mbisi ve. Beni ke talisa na yandi pambú, mpe ntangu yandi ke kwisa sosa pambú mpe yandi ke kangama na ndobo.” Na yina yawu yina beto ke meka na kusala. Yawu yina beto . . . beto . . . Lukanu ya beto kele kunata bantu na Mfumu Yesu Klisto. Mpe Yandi kele mutindu mosi mazono, bubu yayi, mpe kukonda nsuka. Na yawu kana Yandi vwandaka Munganga na bilumbu yina me luta, Yandi kele Munganga bubu yayi.

³⁰ Kaka kimbangi ya munu mosi na ntwala mu sambila samu na bambevo yina ke kuwa na radio. Ya vwandaka na bilumbu fioti me luta, mu vwandaka ya kuvwanda na zulu ya miongo kisika kima ya nene kusalamaka na ntwala bampangi kumi na tanu to makumi zole kuna, kisika Wanzio ya Mfumu kulumukaka na mutindu ya ngitukulu, na Nsemo ya nene yina vwandaka panza mupepe mutindu lowa, mpe matadi vwandaka pumbuka na bitamina ya ba-metre makumi sambanu, to kulutila yina, nziunga na nziunga, ya vwandaka zenga bitini ya bayinti. Mpe mu vwandaka ya kutelama kuna na nsi ya Yawu. Mpe mu tubaka na beni bangonda fioti na ntwala yawu salama, ti Yawu ke vwanda kuna mpe yina ke salama; ya kieleka, ba zabisaka yawu kilumbu mosi na ntwala. Mpe bantu yayi nionso vwandaka kwenda mbangu na nsi ya batomabilu mpe nionso yina, na kumekaka na kutina. Bawu zabaka ve yina vwandaka salama. Mpe Yandi zonzaka mpe tubaka na munu yina ke salama na ntwala.

³¹ Mu vwandaka ya kuvwanda kuna na ditadi mosi kuna, kaka kisika Yandi monanaka, mu vwandaka na nkundi mosi yina vwandaka na beto, yina katukaka kuna na Minnesota. Bantu ya yandi kele awa na suka yayi mpe mu ke zaba ve kasi yandi lendaka vwanda awa na étage yankaka. Ya vwandaka Donavon Weerts, mpe bakala mosi ya mbote ya ntwenia, Luthérien yina me pesa luzingu ya yandi na Klisto mpe yina me fuluka na Mpeve. Mwana-bakala mosi ya Allemand ya kukikulumusa mingi, pene ya bamvula makumi tatu, na dibuta mosi, bana zole to tatu. Yandi kwendaka kuna na Tucson kaka samu na kuvwanda nkalani ya munu, kisika bantu nkama tatu to yiya kwendaka zinga samu na kuvwanda bankalani ya munu. Na yawu yandi . . .

³² Mpe mu ke na kiese na kuvwanda na bankalani ya mutindu yayi. Ba ke landaka munu bisika nionso tii na Afrique du Sud, mpe bisika nionso, samu na kuvwanda pene mpe kumona . . . na munu, mpe kuvwanda na munu mpe kudia biese ya Mfumu.

Bakala mosi ya ntwenia ya kukikulumusa mingi, mu me tubaka na yandi mingi ata fioti ve.

³³ Samu, bantu yina mu zaba mpe mu ke vwandaka na bawu kintwadi kele kaka mutindu mpangi ya munu ya bakala, mpangi ya munu ya kento. Mu ke talaka bawu, mpe kana mu me mona ti bawu me banda na kubasika na nzila, na yina mu ke baka na lweka mpe mu ke tuba na bawu, samu mu ke zolaka bawu. Beto zola kuzinga na Nkembo kintwadi. Mpe na bantangu yankaka ti mbala yankaka, na balukutakanu, beno ke mona ti mu ke tubaka na beno na mutindu ya nganzi. Ya ke samu na yawu ve. Ya kele ve ti samu mu ke zolaka beno ve, kasi ya ke katuka na kati ya ntima ya munu, samu mu—mu . . . Yawu fwana vwanda kaka na mutindu mosi. Ya ke kaka na mutindu mosi ya kusadila Nzambi, mpe ya kele . . . Mpe beto fwana bikala na nzila ya Yandi, ata yinki mutindu mabanza ya beto kele. Nzila ya Yandi!

³⁴ Mpe mu talaka Donavon, na nsongi ya dikutu ya yandi ya kibakala, ya vwandaka ya kuvimba mbala yankaka mbala tatu na kitezo ya kieleka, mpe mu monaka ti ya vwandaka mbwaki mingi. Mbote, ntangu yayi mu banzaka mbala yankaka ti, kuna na ntoto ya kuyuma mwa bilumbu me luta, ti kisika yina beto vwandaka, ti mbala yankaka bansende ya cactus kotaka na dikutu ya yandi. Kasi, ntangu mu bakaka diboko ya yandi, mu monaka ti ya vwandaka cancer. Na yawu mu tubaka na Donavon, mu tubaka, “Donavon, nge ke . . . Ya me sala bilumbu yikwa na dikutu ya nge?” Samu na kubenda bukebi ya yandi ve, mutindu mu vwandaka zaba ve. Mu tubaka, “Ya me sala bilumbu yikwa kubanda ya kele kuna, Donavon?”

Yandi tubaka, “Mpangi Branham, pene ya bangonda sambanu,” yandi tubaka.

Mu tubaka, “Samu na yinki nge tubaka yawu na munu ve?”

³⁵ Yandi tubaka, “Oh, mutindu mu monaka nge na bisalu mingi ya kusala,” yandi tubaka, “Mu zolaka ve ku—kusala yawu.” Yandi tubaka, “Mu banzaka mbala yankaka na ntangu mosi Mfumu fwana tuba na nge.”

Na yawu mu tubaka, “Nge zaba yina yawu kele?”

Yandi tubaka, “Mu ke banza ve.”

Mu tubaka, “Ya kieleka.”

³⁶ Mpe na suka ya zole, kima yankaka ve ti, kusimba kaka diboko ya mwana-bakala yina, na suka ya zole, ya vwandaka diaka ve ata kidimbu na zulu ya dikutu ya yandi. Nionso vwandaka me kwenda.

³⁷ Na bantangu beto ke salaka kingolo-ngolo, na kumeka kukuma na *yayi, yina*. To . . . Beno me mona, ya kele, “Bidimbu yayi ke landa mukwikidi.” Ya me tuba ve ti “kana bawu sambila samu na bambevo.” “Kana bawu tetika maboko na zulu ya bambevo, bawu ke beluka!” Beto fwana vwanda na lukwikilu, beto mosi, na yina beto ke na kusala. Mbote mingi.

38 Na yawu ntangu yayi Donavon kele kaka awa. Beno ke kutana na yandi. Yandi ke vwanda awa, kana yandi kele awa ve na suka yayi, na étage yankaka. Beno ke kutana na yandi, mpe yandi ke zaba kimbangi yango.

39 Mpe yinki diaka mu lendaka tuba? Mu ke kwikila Luc, to Jean, mosi na kati ya bawu, tubaka ti yinza lendaka vwa- . . .vwanda ve, lendaka vwanda ve na babuku yina ba lendaka sonika samu na yina Yandi salaka na kati ya bantu na bilumbu ya nsuka; mutindu bambevo belukaka, binwa malafu kukuulamaka, na mafunda ya yawu, mpe bimbevo ya mutindu na mutindu mpe bampasi.

40 Ntangu yayi, beno yina ke kuwa na radio, mutindu mosi bayina kele awa, mu me simba awa ntangu yayi nkuta ya nene ya balombilu yina me kwisa na nzila ya allo-allo na suka yayi, ya ke na kuyimba konso ntangu kubanda ntangu beto me kuma awa. Mpe na yawu . . . Nkama mosi na makumi yivwa na sambanu ya balombilu me kota na suka yayi, na nzila ya allo-allo, kubanda ntangu beto me kuma awa. Na yawu beto vukana na bisambu ntangu yayi na ntangu konso muntu . . . Bisika nionso beno kele, kuna na kati ya yinsi, beno tetika maboko ya beno na zulu ya mosi na yankaka, kana beno kele mikwikidi. kana ve, beno tetika diboko ya beno na zulu ya Biblia to kima mosi kuna, na ntangu beto ke sambila awa mpe kuna.

41 Tata ya luzolo ya Mazulu, mwa kimbangi ya Donavon Weerts, ya ke kaka mosi na kati ya mafunda, Mfumu, ti na lemvo ya Nge. . . Mu ke sambila ti Nge ke tala na kati ya bantima ya bantu yayi kele awa na bayina ke kuwa na radio. Mpe bika ti bawu, bawu nionso, kubeluka. Bika ti mpeve ya yimbi kubika bawu, mpe bika ti bawu vwanda ya kuulama na bampasi ya bawu nionso. Pesa yawu, Tata. Na Nkumbu ya Yesu Klisto, Mwana ya Nge, beto ke lomba yawu. Amen.

Matondo na Nge, Mfumu . . . [Kisika ya mpamba na bande—Mu.]

[Mpangi Branham me manisa nsamunu ya zole na radio—Mu.]

☆☆☆☆☆☆

42 Mbote, yayi kele mbala ya tatu samu na munu na kumata awa na suka yayi. Oh! Mpe, beno zaba, ba me tuba na munu beto fwana bika kivinga pene ya minuti kumi na zole, kumi na yiya, to kima mutindu yina. Mpe bantwadisi ya lukutakanu me tuba, bayina kele na étage yankaka kuna, mpe bawu lenda pesa madia ve. Madia ya beto me kwenda yinda mingi. Beto ke na malonga mingi, beno zaba. Na yawu beto ke na kiese mingi, mingi ti beto me kuzwa jubilé ya nene ya kivumu, ya kimpeve, mutindu mu lendaka bokila yawu, na suka yayi awa na nkonga yayi ya kitoko ya babakala.

43 Mu ke zola ku—kutuba ti beto kele. . . balukutakanu diaka, mbasi na manima ya midi, kuna na Embassy. Ntangu yayi, beto ke sambila samu na bambevo kuna, mpe beto ke vingila Nzambi kukutakana na beto. Mpe mu me kwisa nata mwa kitini ya munu, ministere ya munu, kusala ti (nionso beto lenda sala) lukutakanu yayi kuvwanda lunungu. Lunungu ve samu ya ke balukutakanu ya beto, kasi lunungu samu bantu me kuzwa Yesu Klisto. Ya kele lunungu. Na balukutakanu, ata yinki mutindu beto ke kumisa Nzambi, ata yinki mutindu beto me mona Yandi ke sala mambu ya nene, ya vwanda bambala yikwa Yandi ke tuba na beto na Mpeve, mpe nionso yina; kana kima mosi me salama ve, mioyo me kota na Kimfumu!

44 Mpe Mpangi Shakarian me sala nsamunu ya kieleka ntangu yayi samu na yina yandi banzaka samu na bilumbu yayi beto ke—beto ke na kuzinga. Ya kieleka mu ke kwikila na ntima ya munu ya muvimba, ti beto ke zinga kaka na ntangu ya nsuka, kaka na—kaka na bivudi ya nkokila. Mwini me kuma na nsuka. Mpe ntangu beto ke mona mambu ke salama mutindu yawu kele bubu yayi, na yina, ya ke mpasi na kutuba yina nsungi yankaka lendaka nata. Mwa bilumbu fioti me luta. . .

45 Beno bika mu zabisa beno kima mosi. Bawu fimpaka balukolo nionso, ya Arizona, kisika mu ke zingaka. Bawu pesaka na bana, kukondwa bawu zaba, kizame ya yintu. Mpe beno zaba yinki? Ya vwandaka samu na ba-école secondaire na—na ba-école primaire, ya vwandaka na bana makumi nana na zulu ya nkama mosi na kimbevo ya yintu. Makumi sambwadi na zulu ya nkama mosi na kati ya bawu vwandaka tala television ntangu nionso. Beno me mona, bima yayi ya yimbi me kota na mayele na kati ya beto mpe beto lenda ve. . . Beno ke kukiyufula samu na yinki ya ke kwisa. Beno lenda kuwa Ndinga ya Nzambi ke nganina yawu, mpe kasi tala beto—beto mosi me kota na kati ya yawu.

46 Beno bika mu tuba na beno diambu mosi ya mpasi. Beno me mona, “Ya kele ve bayina ke tubaka na Munu, ‘Mfumu, Mfumu,’ ke kota; kasi yina ke sala luzolo ya Tata ya Munu.” Luzolo ya Yandi kele Ndinga ya Yandi. Beto lenda vwanda bantu ke sambilaka mingi, kuvwanda na bantangu ya nene, ke boka, ke dumuka, na balukutakanu yayi, yayi beto kele. . . Mu ke sawula ve—mu ke sawula ve. Kasi mu ke na kusalu ya kusala na Nzambi, mpe kusalu yango kele kuvwanda ya kuvedila mpe kutuba yina Yandi zola ti mu tuba. Mpe ya kieleka mu ke—mu ke vutula matondo samu na kimvuka ya California yina me vwanda na ntima ya yinda na munu samu na—na mambu mu ke kwikilaka. Kana mu tubila ve mambu mu ke kwikilaka, mu kele muntu ya luvunu mpe ntangu yayi mu ke vwanda ya kieleka ve na beno. Mpe kana mu lenda vwanda ya kieleka na beno ve, wapi mutindu mu ke vwanda ya kieleka na Nzambi? samu mu ke mona beno mpe mu ke solula na beno. Ya kieleka, beto ke tubaka, na

Nzambi, mpe, kasi beto fwana vwandaka ya kieleka ya kuvedila mpe ya kieleka na ntwala ya mosi na yankaka. Ya kieleka beto kele na nsungi mosi ya kiadi, ya kiadi. Mpe beno me telemaka ntete. . .

47 Beno bika mu zabisa beno mu pesa na beno mwa dibanza mosi. “Ya kele ve bayina nionso ke tubaka na Munu, ‘Mfumu, Mfumu,’ ke kota kuna; kasi yina ke sala luzolo ya Tata ya Munu.” Yesu tubaka, na zulu ya ntoto, “Muntu ke zinga kaka na dimpa ve kasi na Ndinga nionso.” Ndinga nionso! Ya ke kaka ve ntangu nionso, Ndinga mosi, kasi Ndinga nionso.

48 Ya vwandaka Ndinga mosi yina ba kwikilaka ve, ya Nzambi. . . ya misiku ya Nzambi, yina nataka lufwa, kiadi, mpe bimbevo nionso mpe mpasi ya ntima, kuzimbana Ndinga ya Nzambi, Ndinga mosi kaka! kana yawu nataka bantu na lufwa, na kuzimbanaka, kukondwa kukwikila Ndinga mosi, “ya kieleka,” ya kieleka. Kasi Yandi tubaka ti yawu ke salama. Satana tubaka, “Ya kieleka ya ke salama ve.” Kasi yawu salamaka.

49 Na yawu, beto fwana zitisa Ndinga nionso ya Nzambi. Mpe kana muntu mpe bampasi yayi mpe bima yayi nionso muntu me kutana na yawu, samu na ntendulu ya yimbi, to—to kukondwa kukwikila Ndinga mosi, wapi mutindu beto ke vutuka kana beto me zimbana Ndinga mosi, samu ya lombaka ntalu ya mutindu yayi, tii na luzingu ya Mwana ya Yandi?

. . . Ba me bokila bantu mingi, . . . ba me pona bantu fioti.

. . . Ba me bokila bantu mingi, . . . ba me pona bantu fioti.

50 Mu lenda baka dilongi na yayi ve, kasi, samu beto ke na ntangu ve, kasi mu ke zola bikila beno kima mosi.

51 Beto banza samu. . . Mu kwendaka kilumbu mosi na Mpangi Shakarian, kisika ba vwandaka vukisa bankuna ya bitwisi. Mpe mu monaka. . . na laboratoire kisika Mpangi Shakarian kotisaka munu. Mpe ba dindisaka na kati ya sperme ya ngombe ya bakala, mwa. . . mutindu mwa kisadilu mosi, mutindu yinti ya fofolo, mpe bawu bakaka mwa ndambu ya sperme, mpe ba tulaka yawu na nsi ya loupe yina vwanda kumisa yawu nene bambala nkama. Mpe ya vwandaka na mwa bankuna yina vwandaka dumuka na kati kuna, na kati ya sperme. Na yina, beto me zaba ti nkuna ke katukaka na bakala, mpe diki ke katukaka na kento. Mpe mu yufulaka chimiste yina kuna, mu tubaka, “Yinki yina ke dumuka fioti mutindu yina?”

Yandi tubaka, “Yina kele—yina kele mwa bangombe ya babakala na bana ya ngombe.” Beno me mona?

Mpe mu tubaka, “Na mwa ditonzi yina?”

Yandi tubaka, “Yinga.”

⁵² Mu tubaka, “Na yina ntangu yankaka na kati ya sperme ya muvimba ya ke vwanda na difuku mosi?”

Yandi tubaka, “Oh, yinga.” Beno me mona? Ntangu yayi, beno tala na bukebi.

⁵³ Ntangu yayi, ntangu kima yayi ya nene ke salama, ya kele na diki mosi ke vingila nkuna mosi kuna na kati difuku yina. Mpe muntu mosi ve lenda tuba yinki nkuna ya ke vwanda, to yinki diki ya ke vwanda. Kana beno tala lubutuku ya kimuntu, ya ke na mansweki ya kulutula mingi ti—ti lubutuku ya bumwense. Samu, na kati ya sperme yayi, ya ke na mosi na kati kuna yina ba zabaka na ntwala samu na kuzinga, mpe yankaka nionso ke kufwa. Mpe ya kele ve yina me kuma ya ntete; ya kele yina me vukana ntete na diki. Ntangu yankaka diki lendaka kuma na nsuka ya sperme, to na kati-kati ya sperme; nkuna lenda sala mutindu mosi, diki. Nkuna ke telumuka na kati ya diki, mpe mwa mukila ya yawu ke zengana, mpe mwa mukwa ya mukongo ke banda na kusalama. Ya ke kaka na mosi na kati ya nkonga yina, ya difuku mosi, yina ke sala yawu, mosi kaka; mpe ya kele Ngolo yina muntu me zaba ve, yina ke bakaka lukanu. Kasi beno kele, beno nionso, mutindu mosi, bankuna yina nionso kele kaka mutindu mosi. Mutindu mosi na baniama. Mutindu mosi na muntu. Ya ke zenga nkanu kana ya ke vwanda mwana ya bakala, mwana ya kento, bansuki ya mpembe, bansuki ya ndombe to yankaka. Ya ke Nzambi ke zenga nkanu. Nionso ya bawu ke vwanda mutindu mosi, na kutala, kasi ya ke kaka mosi yina fwana zinga; mosi na kati ya difuku mosi, kasi nionso ya bawu kele mutindu mosi.

⁵⁴ Ntangu Israël bikaka Egypte, ya vwandaka na bantu pene ya mafuku zole na ntangu mosi. Bawu nionso kuwaka nsangu ya profete. Bawu nionso monaka Dikunzi ya Tiya. Bawu nionso botamaka na Moise, na Nzadi ya Mbwaki. Bawu nionso bokaka kati na—kati na Mpeve, bawu bulaka tambourin mpe bakaka mbangu sika na sika na kumu, na Myriam, ntangu Moise yimbaka kati na Mpeve. Bawu, bawu nionso, kunwaka na Ditadi mosi ya kimpeve. Bawu, bawu nionso, kudiaka Mana konso nkokila. Bawu nionso! Kasi ya vwandaka zole yina kotaka na yinsi, mosi na kati ya difuku mosi.

⁵⁵ Yinki vwandaka kitesilu? Bawu nionso kunwaka na Ditadi mosi, bawu nionso kudiaka Mana ya kimpeve ya mutindu mosi mutindu beto ke na kudia na suka yayi, kasi kitesilu ya Ndinga siamisaka yawu. Ntangu ya kumaka ntangu ya Kadès-barnéa, ntangu bawu zolaka kota na yinsi ya nsilulu, mpe bawu lendaka kota ve na ntwala ba tesa bawu na nzila ya Ndinga. Mpe kumi yankaka vutukaka, mpe tubaka, “Beto lenda sala yawu ve! Bantu kele mutindu. . . Beto kele mutindu matiti, na ntwala ya bawu, mbanza ya bawu kele na bibaka ya nene. Mbendumuka kele ngolo mingi.”

56 Kasi Josué na Caleb vwandisaka bantu pima. Bawu tubaka, “Beto ke na kiyeka ya kulutila samu na kusala yawu!” Samu na yinki? Nzambi tubaka, na ntwala bawu katuka, yinsi ya nsilulu, “Mu me pesa beno yinsi. Mu me pesa yawu na beno. Ya kele ya beno.” Kasi ya vwandaka na mosi na kati ya difuku mosi.

57 Ya ke na Baklisto ya kati-kati pene ya nkama tanu na yinza bubu yayi, mpe konso kilumbu ke sukisaka nsungi ya bantu. Mpe ntangu yayi, yinki ke vwanda kana Enlevement ke salama bubu yayi mpe bantu nkama tanu, na yinza ya muvimba, me kwenda na Enlevement? Beno ke zaba ata fioti ve to beno ke mona yawu ve na zulunale, samu na kukwenda ya bawu. Mpe Nkwizulu ya Mfumu kele Nkwizulu ya kinsweki. Yandi ke kwisa mpe ke sala yawu na kinsweki. Ya ke vwanda kaka na bantu fioti, tii . . .

58 Kaka mutindu ya vwandaka na bilumbu yina ntangu bilandi yufulaka Yesu, “Samu na yinki Bansoniki me tuba ti—ti Elie fwana kwisa ntete?”

Yandi tubaka, “Yandi me kwisaka dezia, mpe beno zabaka yawu ata fioti ve.”

59 Beno me banzaka ntete yina bantu salaka? Bawu landilaka na kukwikila ti Mala- . . . ti Mal- . . . Elie ke kwisa. Mpe yandi vwandaka na kati ya bawu, mpe bawu zabaka yawu ve.

60 Mutindu yina ya ke vwanda na nkwizulu ya Mwana ya muntu! Ba ke sala na Yandi kaka mutindu mosi. Mpeve ya Nzambi kele awa. Mbote, yinki beto ke sala na Yawu? Beto ke kudia Mana, mpe nionso yina, mpe kukondwa kukwenda na ntwala mutindu beto ke kula?

61 Beno me monaka ntete nkuna mosi, mutindu Révérend Pitts vwandaka tuba na mwa ntangu fioti me luta, mpe nkuna yina ba me tula na ntoto? Ya ke na bankuna mingi kuna na kati ya ntoto. Ntangu Nzambi vwandaka luta na zulu ya masa, na Nsemo, mpe Nsemo basisaka, Mvwandulu ya ntete ya Nzambi, Nsemo me tubama kwisaka na nzila ya Ndinga ya Nzambi. Mpe Ndinga ya Nzambi kele kima mosi kaka ke nata diaka Nsemo. Mpe ntangu bamasa vutukaka na manima, nkuna vwandaka dezia na ntoto, mpe Nsemo kaka basisaka bankuna yina vwandaka na luzingu na kati ya yawu, basikaka. Nzambi vwandaka sala kivangi ya Yandi.

62 Mpe ntangu yayi, na suka Paki ya vwandaka na Nsemo yankaka yina bulaka ntoto, ntangu Mpeve-Santu pesamaka. Mpe Yawu me pesama samu na kunata Nsemo na Bankuna yina Nzambi, na nzila ya luzabu ya Yandi ya mantwala, zaba yina ke vwanda awa na zulu ya ntoto. Mutindu Yandi zabaka nkuna ya ntete ya kimuntu, Yandi zaba kisika Nkuna ya kimpeve kele. Nzutu ya beno vwandaka awa na zulu ya ntoto na mbandukulu, ntangu Nzambi salaka ntete ntoto. Beto kele kitini ya ntoto. Beto vwandaka kuna. Mpe na nzila ya luzabu ya Yandi ya mantwala Yandi zabaka kieleka nani lendaka zola Yandi mpe nani lendaka

sadila Yandi, mpe nani lendaka sala yawu ve. Yandi ke zaba yawu na nzila ya luzabu ya mantwala. Kana ya ke mutindu yina ve, na yina Yandi kele Nzambi ve. Yandi lenda vwanda Nzambi ve kukondwa kuvwanda ya seko. Mpe kana Yandi kele ya seko, Yandi zaba bima nionso.

⁶³ Na yawu, beto ke mona bantu ke sala buzoba. Ba ke bula disakuba na yawu. Bawu ke kwenda mbangu na yawu, mpe bawu ke banza *yayi* mpe *yina*, kasi ya ke tambula mbote ve, beto ke mona yawu. Kasi ya ke na kima mosi ke tambula mbote, ya ke kuzaba luzolo ya kulunga ya Nzambi mpe kukangama na yawu, yina Nzambi bokilaka beno na kusala.

⁶⁴ Mutindu Mpangi Jack me tuba na mwa ntangu fioti me luta samu na parc Pershing Square, ya mubulu nionso. Mosi mutindu *yayi*, mpe yankaka mutindu *yina*; mpe samu na ba-théologien, mpe nionso yina, kana beno zola zaba théologie, beno kwenda kuna.

⁶⁵ Mu banza ti ya ke fioti mutindu ya kele na Park Hyde na Londres. Mu vwanda kuna, muntu nionso ke na dibanza ya yandi mosi. Ya ke—ya ke kimvuka ya bima ya Babylone na yinza ya bubu yayi.

⁶⁶ Kasi beno me bakula mutindu—mutindu Mpangi Pitts kulandilaka na kutuba na beto na nsangu ya yandi ya kitoko na suka yayi? Na ntangu yandi bandaka na kubasika na park, kuna yandi monaka mwa fololo yayi lis ya Paki. “Na kati-kati ya mubulu nionso,” mutindu yandi me tuba na beto, “yawu vwandaka ve na mutindu ya kutuba ‘yinga’ to ‘ve.’ Ya vwandaka luzingu ya Nzambi ke sema na kati ya yawu, na kati-kati ya mubulu nionso.” Ya vwandaka kuna ke ngenga, samu Nzambi tumaka na yawu na kuvwanda kuna. Na kati-kati ya kunwana, muntu mosi ve monaka yandi. Bawu monaka ve kisalu ya yawu ya kimpeve.

⁶⁷ Mpe ya ke mutindu mosi bubu yayi na kati ya bakuvukana ya beto ya nene mpe bimvuka, mpe mabuundu mpe badenomination, mpe nionso yina. Mosi ke benda bantu na lweka *yayi*, “Beto fwana vwanda ba-Baptiste, to beto fwana vwanda ba-Presbytérien, beto fwana vwanda *yayi*, *yina*, to *yankaka*.” Na kati ya nionso yayi, fololo mosi ke na kubasika. Ya ke na ngolo ya Nzambi na kati ya beto, yina ke na kubasika na kati ya beto nionso. Beno telama kisika yina mpe beto tala yawu mbote-mbote, na mwa minuti fioti, mpe beto tala yawu na sabala yayi, mpe beto ke mona yawu ke zibuka pwelele na ntwala ya beto. Beto ke kwikila ti Nzambi ke sala yawu. Mutindu yina ve? [Dibuundu me tuba, “Amen.”—Mu.]

⁶⁸ Mu ke mona ti beto fwana kulumuka na nsi ntangu yayi. Na yawu beto sambila, beto nionso.

⁶⁹ Nzambi ya luzolo, ntangu beto me kulumusa bayintu ya beto na Ntwala ya Nge, beto me mona ti beto me lunga ve na kulomba.

Kasi Nge silaka na beto ti, kana beto me kwisa, Nge ke losa beto ve. Mpe bansamunu yayi ya ngolo me basika, ya ke samu na kusala dilongi ve, “mosi na kati ya difuku mosi,” kasi ya ke samu na kubambuka moyo. Samu Nge tubaka:

*. . .mwelo kele ya fioti, mpe nzila kele ya fioti mingi,
yina ke nata na luzingu, mpe bantu fioti ke mona yawu.*

Samu ba me bokila bantu mingi, kasi ba me pona bantu fioti.

⁷⁰ O Tata ya Kukonda nsuka, fidisa Nsemo ya Nsangu ya mbote bisika nionso na mbanza yayi, na lukutakanu ya sabala yayi ke kwisa. Mpe kana ya ke vwanda na Bankuna, na mutindu nionso na nzila ya luzolo ya Nge ya nene, ya ndwenga, mutindu mu vwandaka meka na kutalisa yawu na kati ya sperme ya bakala na kento, bawu kwisa mingi na lukutakanu. Bika Mpeve-Santu kupesa bawu Nsemo. Beto ke mona ti mbala yankaka ntangu me luta mingi kulutila mutindu beto ke banza. Beto ke sambila, Nzambi, ti mutindu beto me kwisa awa, na kukwikilaka kaka ti kima mosi lenda salama awa samu na kusadisa bantu, to—to samu na kukanga dimeme yina ya nsuka. Beto me zaba, ntangu dikabu ke ya kufuluka, na yina Muvungi ke kanga kielo.

⁷¹ Mutindu ya vwandaka na bilumbu ya Noé, ntangu kinama ya nsuka ya dibuta kotaka, Nzambi kangaka kielo. Mpe bawu bulaka mpe tutaka, kasi ntangu vwandaka me luta mingi. Nzambi ya luzolo, bawu kuzwaka ntangu ya mbote.

Nge tubaka, “Mu kele Kielo ya lupangu ya mameme.”

⁷² Mpe ya ke mfunu mingi nkunga yayi muyimbi sonikaka, “Makumi yivwa na yivwa me lunga me lunga ve samu na Nge? Kasi, ve, ya vwandaka na mosi yankaka.” Ya lendaka vwanda mwa dimeme ya ndombe, to ya lendaka vwanda mwa dimeme ya bakala to ya kento. Beto me zaba ve kisika bawu kele, kasi yina ya nsuka fwana kota na manima kielo ke kangama. O Nzambi, Yina me zaba bima nionso, fimpa baluzingu ya beto na suka yayi. Mpe fidisa beto bisika nionso yina beto lendaka kwenda, samu na kumona dimeme yina ya nsuka, na yina kielo ke kangama ti Muvungi kuvwanda na kati na mameme. Pesa yawu, Mfumu. Kana ya kele awa bubu yayi, kana yina lendaka kota . . .

⁷³ “Bayina nionso Tata pesaka Munu ke kwisa na Munu. Mpe muntu mosi ve lenda kwisa, kukondwa Tata ya Munu kubenda yandi.”

⁷⁴ Mpe kana ya ke na kima mosi ke benda, to mwa nsatu mosi, ti ya lendaka vwanda ngunga samu na muntu awa na kivinga yayi, awa to na nsi, to bisika nionso bawu lendaka vwanda, bika ti bawu pesa mvutu, “Yinga, Mfumu, mu ke mwa dimeme yina me zimbana nzila; mpe mu me nwana na Yawu, luzingu ya munu ya muvimba. Mu—mu—mu me kuwa ti mu lenda kwisa, kasi bubu yayi mu ke na lweka ya lubelu. Mu lenda mata to kukulumuka ve. Mu lenda kwenda kisika mosi ve.” Oh, bika ti Muvungi ya nene

kukwisa, Yandi tandula maboko ya yandi ya lembami mpe Yandi kotisa yawu na lukengolo, Yandi tula yawu na zulu ya mapeka ya Yandi mpe Yandi vutula yawu na lukengolo.

⁷⁵ Ntangu yankaka ya ke na mosi awa, Mfumu, yina kele na mbevo, na mutindu mosi, ti dokotolo me tuba, “Ya ke na kima mosi ve ba lenda sala.” Yandi me sala kingolo-ngolo na kusadisa yandi, kasi yandi lendaka sadisa yandi ve. Ya ke ntama ya maboko ya yandi. Ya ke—ya ke na kima mosi ve yandi lenda sala. Bankisi ya yandi to mbele ya yandi lenda simba yawu ve. Kasi, O Mfumu, ya ke na kima mosi ve kele ntama na diboko ya Nge ya nene, mpe Ndinga ya Nge kele diboko ya Nge. Na yawu beto ke sambila, Nzambi ya Luzolo, ti, na suka yayi, na ntangu beto ke tuba na Nge, ti Nge ke kulumusa diboko samu na kutelemisa dimeme yina kele ya kubela mpe lenda kukisadisa ve, yina kele ntama ya bantu ya mayele, yina dokotolo me yambula, bika ti bawu kubeluka. Pesa yawu, Mfumu.

⁷⁶ Mutindu beto ke banza na David, mutindu yandi bakaka kiyeka na zulu ya mwa mameme, mwa mameme fioti. Kasi kilumbu mosi ulusu mosi kwisaka mpe kangaka mwa dimeme yina mpe tinaka na yawu, mpe ya zolaka kudia yawu (mutindu cancer lendaka kudia nzutu), to nkosi ya nene. Kasi David, yina vwandaka na binwaninu ya mbote ve na munduki, to, mbele ve, kasi na lanse kaka, yandi landaka dimeme yina. Mpe ntangu yandi monaka niama yina zolaka kufwa mwa dimeme, yandi kufwaka yawu na lanse. Mwa munduki ya fioti na mwa kitini ya cuir na nsinga, mpe, kasi yandi tulaka kivuvu na yawu.

⁷⁷ Beto ke na bantu ya mayele mingi ve na kati ya beto, Mfumu. Beto kele bantu ya nene ve na mwa kisambu, kasi beto ke kwisa na suka yayi samu na kulanda dimeme ya Tata. Kento yina me tambula na babala-bala, na kiadi, na kunwaka makaya, na kumekaka na kuzwa ngemba na nzila ya makaya; bakala yina me kuwa nsunga ya dikopa ya malafu mpe me meka na kuvutula yawu na zulu ya mesa, kasi mbeni me kanga yandi ngolo mingi; mwana-bakala yina to mwana-kento ti me meka na kusala mambu ya mbote, kasi yina ke kuzwa ve ngolo ya kubika kima yina ya yimbi; beto me kwisa na Nkumbu ya Mfumu Yesu, samu na kulomba dimeme yina na suka yayi. Beto me telemina mbeni yina; samu ya ke diambu ya mpasi ve, lanse mosi, kisambu mosi, kasi beto ke kwisa samu na kuvutula dimeme yina na lupangu ya Tata, samu beto pesa mvutu samu na bima yina ba pesaka beto. Bika ngolo ya Nzambi kukuluka ntangu yayi, samu na kupesa lukwikilu na bantima ya bantu, mpe bika ti moyo yina zimbanaka kuvutuka na suka yayi. Bika ti bampukumunu ya luzingu yayi kuyambula yandi, yandi kwenda. Mpe bika yandi vwanda na lukengolo na zulu ya mapeka ya Mulongi, yina ke vutula yandi diaka na lukengolo. Beto ke lomba yawu na Nkumbu ya Yesu. Amen.

⁷⁸ Nzambi sakumuna beno nionso. Tii kuna mu ke mona beno

mbasi, mu ke pesa lukutakanu na Mpangi Shakarian. [Kisika ya mpamba na bande—Mu.]

[Mpangi Branham me manisa kitini ya tatu—Mu.]

☆☆☆☆☆☆

⁷⁹ Yayi, mu—mu banza ti beno ke. . . ti mu ke kuzwa lemvo mingi na ntwala ya Nzambi mpe na ntwala ya beno, kukwikila ti mu lendaka telama awa samu na kutuba na beno kima mosi ya luvunu. Mu me lungisa bamvula makumi tanu na sambanu, kilumbu yankaka. Yayi kele ve Nsangu ya bakala mosi ya kiboba. Ntangu mu vwandaka diaka ntwenia mu vwandaka kwikila yawu. Mpe kana yayi kele kieleka ve, mu kele muntu ya kulutila zoba yina Nzambi me kuzwa na zulu ya ntoto. Mu me pesa luzingu ya munu ya muvimba samu na Yawu. Mpe beno bika mu tuba yayi na mutindu ya kuvedila: ata ti mu vwandaka na baluzingu mafunda, mu zolaka soba dibanza ya munu ata fioti.

⁸⁰ Ntangu yayi, kubeluka ya nzutu kele na diboko ya konso muntu. Beno bambuka moyo, kubeluka ya nzutu kele na kati ya beno. Nzambi tulaka na yinti ya pèche ba-pèche nionso yina zolaka vwanda na kati ya yawu, ntangu Yandi kunaka yawu na kati ya Disamba. Beno me mona, beno ke. . . yinti ya pèche to yinti ya pomme, to yinti yina ke butaka mbuma, ya ke kula kaka, na kunwaka masa na ntoto. Ntangu yayi beno nionso kele na makuki na kati ya beno, ya kukuula beno, samu ya kele Nzambi, kubanda ba kunaka beno kati na Klisto na nzila ya mbotika (masa ya mbotika ve), mbotika ya kimpeve. Beno ke kwisa na Klisto ve na nzila ya mbotika ya masa. Na nzila ya mbotika ya kimpeve!

⁸¹ Mbasi na manima ya midi, kana Mfumu me zola, mu ke tubila yawu, *wapi* mpe *yinki* kele kisalu ya Yawu ya kieleka. Beto ke sala yawu na manima ya midi samu na kuyangisa ve balukutakanu ya beno.

⁸² Ntangu yayi beno tala, beno nionso awa kele mutindu bakwikidi, beno me mona, na yina Luzingu yina vwandaka kati na Klisto kele na kati ya beno. Ya ke mpasi, kana beno lendaka mona yawu!

⁸³ Ya ke kisalu ya diabulu na kupekisa beno na Yawu, na kufwa meso ya beno. Yandi lenda kaka kufwa meso ya beno, samu ti, beno me mona, beno zaba ve kisika beno ke kwenda na ntangu yina. Bakala yina kele meso ya kufwa lenda tuba ve kisika yandi ke kwenda, yandi fwana yufula na muntu yina lenda mona. Na ntwala beto bakula, muntu mosi fwana tuba na beto yina kele Kieleka.

⁸⁴ Mpe Klisto kufwaka samu na beno, mpe ba me basisa beno na yinza samu na kukotisa beno na Klisto. Mpe nionso yina beno ke na yawu nsatu kele na kati ya beno, na nzila ya mbotika ya Mpeve-Santu. Mutindu yina ve? Ntangu yayi kima mosi kaka beno fwana sala kele kaka kubanda na kunwa Kuna.

⁸⁵ Mpe mutindu yinti ke kunwaka, ya ke banda na kubasisa makasa ya yawu, mwa matiti, ya ke buta mbuma ya yawu konso mvula. Mbuma ke vwandaka ve na kati ya ntoto; mbuma ke vwandaka na kati ya yinti. Bantu yikwa ke bakula yawu, beno tuba, “amen.” [Dibuundu me tuba, “Amen.”—Mu.] Na yawu, beno me mona, mbuma ke vwandaka na kati ya yinti, mpe konso yinti fwana kunwa na yinto ya yawu. Mutindu mvula ke noka, ya ke pesa luzingu, na yinti, samu yawu kunwa. Mpe, mutindu yawu ke kunwa, yawu ke kula.

⁸⁶ Mpe ya ke kula tii ya ke basisa matiti nionso, kaka mutindu Dibuundu me kula, samu na kubasisa bafololo na nsungi yayi.

⁸⁷ Mpe, mutindu beto ke kunwa, beto ke kula. Kasi kana yinti me manga na kunwa, na yina yina lenda kula ve. Mpe kana beno ke kwikila yawu kaka na ntangu yayi, mosi na mosi!

⁸⁸ Na yawu, beno zaba mutindu ya Mfumu ya kusala, Yandi ke talisaka mambu ya luswaswanu, yina beno salaka mpe yina beno lendaka sala ve, mpe nionso yina, na kati ya lukutakanu. Beto tulaka kivuvu ti Mpeve-Santu ke kulumuka na zulu ya beto na suka yayi mpe ke sala yawu, mutindu beto vwandaka ya kutelama awa. Kasi mu vwandaka vingila kaka.

⁸⁹ Mu banza ti samu mu vwandaka na kidi-kidi, na kubanza ti kuna na nsi ba ke zola ti beto basika awa, beno me mona. Kasi ba ke na kuingila beto; beto kele na nsukinina ntangu yayi.

⁹⁰ Kasi beno kwikila yayi, na ntima ya beno ya muvimba. Mu ke bondila beno. Kana mu—kana mu me kuzwa lemvo na ntwala ya beno, mutindu muntu ya kwikama, beno kwikila yayi. Ntangu yayi beno tetika maboko ya beno na zulu—na zulu ya mosi na yankaka.

⁹¹ Beno tala ntangu yayi, kuna, Biblia me tuba ve, “Bidimbu yayi ke landa William Branham.” Ya me tuba ve, “Ya ke landa kaka Oral Roberts.” Ya me tuba ve ti ya ke landa “Mpangi Kopp” to “muntu yankaka.”


⁹² “Bidimbu yayi ke landa bawu,” mingi, “yina ke kwikila. Kana bawu tetika maboko na zulu ya bambevo, ba ke beluka.” Ngolo yina ya Nzambi kele na kati ya beno, yawu yina ke nata Luzingu na muntu yina beno me tetika diboko ya beno na zulu ya yandi, yinto ya Luzingu kele Mpeve-Santu.

⁹³ Nzambi ya luzolo, na Nkumbu ya Yesu Klisto, na ntangu yayi ya mpasi yina dibuundu. . . bika ti bantu na ntangu yayi, kuvwanda ve na kidi-kidi, mpe bika Ngolo yina vumbulaka Klisto na ntoni, kusikimisa na kati ya bawu na ntangu yayi Kieleka ya Nsangu ya mbote, ti lutumu yina Yesu pesaka vwandaka, kana bawu “tetika maboko na zulu ya bambevo bawu ke beluka.” Bika ti ngolo nionso ya diabulu, bimbevo nionso, maladi nionso, bampasi nionso, minianga nionso yina bantu me kutana na yawu, bika yawu katuka ntangu yayi na nzila ya

lukwikilu. Mutindu bantu yina ke kwikila, beto ke lomba yawu na Nkumbu ya Yesu Klisto. Amen.

⁹⁴ Ntangu yayi beno telemisa maboko ya beno mpe beno pesa Yandi lukumu, kana beno ke kwikila ti Yandi ke sala yawu.

⁹⁵ Nzambi ya luzolo, bébé yayi ke kufwa, Mfumu, kana yayi kusalama ve. Mu ke fundisa kivimbu yayi, na Nkumbu ya Yesu Klisto. Bika yawu kubika mwana yayi me zaba diambu ve. Amen.

Ntangu yayi, badokotolo me meka, mpe bawu me lembana. Beno kwikila kaka. 

65-0424 Mosi Na Kati Ya Difuku
Clifton's Cafeteria
Los Angeles, Californie U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org